

## 2 Jon

### Te launiu hakarua Jon e taataa

**Na hakataakoto hakamattua i roto  
te launiu nei:**

Na tattara kaamata 1.1—1.3

Te laoi hakamaoni 1.4—1.11

Na tattara hakaoti 1.12—1.13

<sup>1</sup> Anau he tama hakamaatua i te lotu.

Anau etaataa atu i akoe te hine hakanaaniu ia ma natamalliki akoe anau elaoi mahi raa. Teenei sei ma anau hokonnau koi, emeia na tama hakaatoa e illoa te hakamaoni raa elaoi kootou,

<sup>2</sup> maitaname te hakamaoni raa e nnoho ma taatou, ia e me ki nnoho tahi roo ma taatou.

<sup>3</sup> TeAtua Tamana ia ma Jisas Krai te Tamariki Aia raa ekou mai taatou na mahi, te manava aroha ia ma tenoholaoi, tena taatou kitoo na mee nei i roto taatou hakapaa hoki ma te hakamaoni ia ma telaoi raa.

#### *Te hakamaoni ia ma te laoi*

<sup>4</sup> Anau e hihia roo, maitaname anau e kite na tamalliki kootou raa e tauttari te hakamaoni raa, e ssau pera ma te Tamana raa ni tattara mai i taatou.

<sup>5</sup> Tena anau etaataa atu i akoe te hine hakanaaniu: taatou hakaatoa kilaoi te tama ma te tama. Teenei sei ma he tuaa vahao nei anau etaataa atu nei; teenei ko te tuaa taatou ni too i te kaamata roo.

<sup>6</sup> Telaoi anau e tattara atu nei e huri mai ma taatou kitauttari na tuaa TeAtua raa. Te tuaa

kootou hakaatoa nillono i te kaamata raa e mee mai ma kootou ki tauttari na tiputipu te laoi raa.

<sup>7</sup> Tammaki na tama hailavvaka kumaaseu i na kina hakaatoa i te maarama nei, na tama se hihhai ma kitattara ma Jisas Kraiis ni hamai no tipu tama raa. Na tama peenei raa ni tama hailavvaka, ia nitama hoki ehakataukaa ma Kraiis.

<sup>8</sup> Kootou kilollohi hakamattonu ki selavaa kootou te peesia ria itaha ma na tuhana kootou raa, e mea kootou ki hai na mahi ki too na tuhana hakamaoni kootou raa.

<sup>9</sup> Na tama se hihhai ki tauttari na akoako Kraiis raa, tena ki hai koi na mannatu laatou raa ni setoo Te Atua i roto na ora laatou. Na tama e tauttari na akoako Kraiis raa ennoho i roto te Tamana ia ma te Tamariki Aia raa.

<sup>10</sup> Ia tena kame nitama e oo atu ma te akoako e kee ma ki akoako atu kootou, tena auu setoo na tama naa i na hare kootou raa, ia auu se meake hoki ma, “Te noho laoi ki nnoho ma kootou.”

<sup>11</sup> Maitaname na tama ekou ake te tauareka i na tama haissara raa ehukui hoki ma na tama raa i na mee sakkino na tama raa e ppena raa.

### *Na tattara hakaoti*

<sup>12</sup> Anau e isi tammaki roo na mee ki tattara atu ikootou, e mea anau se hihhai ki taataa na mee nei i roto te launiu; maitaname anau e maanatu ma ki haere atu no mmata kootou, tena anau hokonnau ku tattara atu ikootou ki hihhia taatou hakaatoa.

<sup>13</sup> Na tamalliki te taina hakanaaniu akoe raa ekou atu hoki na tattara hihhia laatou raa ikootou.

**Nukumanu**  
**The New Testament in the Nukumanu language of**  
**Papua New Guinea**  
**Nupela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

---

PDF generated using Haiola and XeLaTeX on 18 Apr 2025 from source  
files dated 22 Mar 2023

54439682-f8e2-586d-98e1-295d02f74287